

Uunga siunnersuut:**Illunut sanaqataaffiusunut taarsigassarsiat pillugit Inatsisartut inatsisaata
allanngortinneqarnera pillugu Inatsisartut inatsisaat**

(Illunut sanaqataaffiusunut kommunimit taarsigassarsiat, illunillu sanaqataaffiusunik il.il. aserfallatsaaliunissamut, nutarterinissamullu taarsigassarsiat tapiissutillu)

§ 1

Illunut sanaqataaffiusunut taarsigassarsiat pillugit Inatsisartut inatsisaat nr. 28, 3. december 2018-imeersumi tulliuttut allannguutigineqassapput:

1. § 1-imi imm. 3-tut ilanngunneqassaaq:

” *Imm. 3.* Sumiiffinni nunalerinermut atugassiaasuni illunik sanaqataaffiusunik sanaartornissamut, pissarsinissamulluunniit taarsigassarsisitsisoqarsinnaavoq, illu sanaqataaffiusoq ukunannga najugaqarfussappat:

- 1) nunalerisinnaanermut akuersissummik pigisaqartumit, imaluunniit
- 2) inunnit ingerlatsinermik isumaginnittunit.”

2. § 7, imm. 3 ima oqaasertalerneqassaaq:

” *Imm. 3.* Kommunalbestyrelsi taamaallaat illunik sanaqataaffiusunik qanoq ittuunerinik akuerisanik sananermut pissarsinermulluunniit taarsigassarsisitsisinnaavoq, tak. § 35. Qanoq ittuuneranik akuerisaasumi sanaartoqataasumit ikiortinnermut aalajangersagaq malillugu taarsigassarsisup ikiortinnissaa, taarsigassarsisitsinissami piumasaqaataavoq.”

3. § 8 ima oqaasertalerneqassaaq:

” **§ 8.** Kommunalbestyrelsi § 7, imm. 1 malillugu illumik nutaamik sanaqateqarnermi ikkussugassat pisarneq naapertorlugu aaqqissuunneqarsimasunik sumiiffimmilu ikkussugassatut tunniunneqarsimasunik pissarsinermut aningaasartuutitut uppersararneqarsimasunut taarsigassarsisitsisinnaavoq.

Imm. 2. Kommunalbestyrelsi § 7, imm. 2 malillugu illuni sanaqataaffiusuni pioreersuni suli naammassillugu sanaartorneqanngitsuni sumiiffimmi saniatigut atortussanik pisariaqartunik tunniunneqarsimasunik pissarsinermut aningaasartuutitut uppersararneqarsimasunut taarsigassarsititsisinnaavoq.

Imm. 3. Kommunalbestyrelsi § 7 malillugu sanaartorfigissaanermut, toqqavissap pilersaarusiorneranut sanaartorneranullu, sanaartoqataasumit ikiortinnermut aamma ilitsersuisumit ikiortinnermut, innaallagissap, erngup imaluunniit kiassarnerup aqutaasa ikkussornerinut kiisalu innaallagissap ergullu aqutaannut, kuuffissuarnullu attavilernissamut pisortat piumasaqarnerinut aningaasartuutitut uppersararneqarsimasunut taarsigassarsititsisinnaavoq.

Imm. 4. Naalakkersuisut paasissutissanik ilassutaasussanik piniartarnek pillugu maleruagassanik aalajangersaasinnaapput.”

4. § 9 ima oqaasertalerneqassaaq:

” **§ 9.** § 7 malillugu kommunalbestyrelsip taarsigassarsiissutigisai, tak. § 8, ukiuni 20-ni amerlaqatigiinnik akilersugassannorlugit taarsigassarsiissutigineqassapput. Nationalbankip erniaritittagai 3%-pointimik ilallugit taarsigassarsiissutit ernialersorneqassapput. Illup sanaqataaffiusup atulernissaanut akuersissutip ulluanit erniaq aalajangersarneqassaaq, taarsigassarsiallu ukiut taarsersorneqarfissaanni atuulluni.

Imm. 2. Taarsigassarsiissutit ernialersorneqassapput, qaammatillu tamaasa aalajangersimasumik akiliuteqartarnikkut akilersorneqassallutik, qaammammut qaangiuttumut qaammatit aallartinnerini ullormi siullermi, taamaattoq tak. imm. 3.

Imm. 3. Taarsigassarsianut siullermeertumik akiliutigineqartussaq, illumut sanaqataaffiusumut atuilernissamik akuersissutip tunniunneranit ukiumi tulliuuttumi februaarip aallaqqaataani siullermeertumik akilerneqassaaq.”

5. § 10 ima oqaasertalerneqassaaq:

” **§ 10.** Taarsigassarsisup, taassumalu inoqutaasa piffissami pineqartumi isertitaat tamarmiusut ukiut tamaasa januaarip aallaqqaataani naatsorsorneqartut tunngavigalugit, qaammatini tulliuuttuni aqqaneq-marluusuni qaammammut akiliutigineqartartussaq naatsorsorneqassaaq. Siullermeertumik illumut sanaqataaffiusumut atuilernissamik akuersissutip tunniunneranit ukiumi tulliuuttumi januaarip aallaqqaataani.

Imm. 2. Taarsigassarsisup, taassumalu inoqutaasa piffissami pineqartumi isertitai tamarmiusut 300.000 koruunit sinnersimatillugit, taamaattoq tak. imm. 1, isertitaasa 35 %-iisa nalinganik ukiumut tamarmiusumik akiliutissat ilaannik taarsigassarsisoq akiliuteqassaaq, taamaattoq annerpaamik ukiumut tamarmiusumik akiliutissaq. Ukiumut tamarmiusumik akiliutissaq taarsigassarsisumit akilerneqanngitsoq nalikillilerneqassaaq. ”

6. § 10 kingorna ilanngunneqassaaq:

§ 10 a. Kommunalbestyrelsimit taarsigassarsiat § 7 malillugu aningaasartuutit uppersarneqartut tamarmiusut 100 procentii tikillugit annertussuseqarsinnaapput, tak. § 8, nammineq akiliutit ilanngaatilugit, tak. imm. 2.

Imm. 2. § 7 malillugu taarsigassarsitinneqarnissamik siumut neriorsuuteqarnissami, tak. § 8, qinnuteqartup 25.000 koruuninik nammineerluni akiliutissaminik kommunalbestyrelsimut akiliuteqarnissaa piumasqaataavoq. Taarsigassarsitinneqarnissamik siumut neriorsuummik qinnuteqartup akuersinera ilutigalugu, nammineq akiliutissat kommunalbestyrelsimut akiliutigineqassapput. ”

§ 10 b. Inatsisartut inatsisaat manna naapertorlugu illunut sanaqataaffiusunut taarsigassarsiaritanut akilersuutit akilerneqarsimasut, illunik sanaqataaffiusunik pilersaarutaasumik aserfallatsaaliuinissamut, nutarternissamullu kommunip taarsigassarsiissutissatut imaluunniit tapiissutissatut agguagassaanut nuunneqassapput.

§ 10 c. Illut sanaqataaffiusut aningaasalersorneqarnissaat pillugu Inatsisartut inatsisaat manna imaluunniit siusinnerusukkut inatsit naapertorlugu illut sanaqataaffiusut taarsigassarsiffigineqarsimallutik taarsersugassartai suli taarsersorneqartut pilersaarutaasumik aserfallatsaaliornissaannut, nutarternissaannullu kommunalbestyrelsi taarsigassarsisitsinnaavoq imaluunniit tapiissuteqarsinnaavoq.

Imm. 2. Taarsigassarsisitsinissamik siumut neriorsuisoqartinnagu pituttuisumik sanaartornissamut isumaqatigiissuteqarfioersimangitsunut imaluunniit sanaartornernut aallartinneqareersimangitsunut sulianut, tunniussanullu taamaallaat taarsigassarsisitsisoqarsinnaavoq imaluunniit tapiissuteqartoqarsinnaavoq.

Imm. 3. Inissianik aserfallatsaaliuinissamut nutarterinissamullu pisortat ikiorsiissuteqartarnerat, tapiissuteqartarnerat imaluunniit aningaasalersuisarnerat pillugit inatsit alla malillugu kommunalbestyrelsi ilutigisaanik taarsigassarsisitsinnaanngilaq imaluunniit tapiissuteqarsinnaanngilaq.

§ 10 d. Taarsigassarsitinneqartup, taassumalu inoqutaasa piffissami tapiissutit aningaasaliiffigineqarnerini piffissami pineqartumi isertitai tamarmiusut 300.000 koruunit sinnersimangippagit aatsaat tapiissuteqartoqarsinnaavoq.

Imm. 2. 100.000 koruunit tikillugit taarsigassarsisitsisoqarsinnaavoq. Taarsigassarsiaritinneqartut tamakkerlugit akilerneqarsimatillugit, taarsigassarsitinneqarnissamik qinnuteqaqqittoqarsinnaavoq. Taarsigassarsiat ukiuni 15-ini akilersugassanngorlugit amerlaqatigiinnik akilersugassaallutik taarsigassarsiissutigineqassapput. Nationalbankip erniaritittagai 3%-pointimik ilallugit taarsigassarsiissutit ernialersorneqassapput. Taarsigassarsiat ullormi tunniunneqarfiisa ulluanit erniaq aalajangersarneqassaaq.

Imm. 3. Suliat suliarineqarsimaneranut imaluunniit tunniussassat tunniunneqarsimaneranut uppersaammik takutitsinikkut taarsigassarsiat imaluunniit tapiissutit sulisartumut pineqartumut akilerneqassapput.

Imm. 4. Illunik sanaqataaffiusunik pilersaarutaasumik aserfallatsaaliuinissamut, nutarternissaannullu kommunalbestyrelsip taarsigassarsisitsinissaannut imaluunniit tapiissuteqarnissaannut Naalakkersuisut malittarisassanik aalajangersaasinnaapput.”

7. § 11 ima oqaasertalerneqassaaq:

” **§ 11.** § 7 malillugu kommunalbestyrelsimit taarsigassarsiat, tak. § 8, § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut taarsigassarsisup nammineerluni aningaasalersorpagit, tak. § 8, aningaasalersorsimaneranullu uppersaammik takutitsineratigut aatsaat taarsigassarsiissutigisinnaapput.

Imm. 2. § 7 malillugu kommunalbestyrelsip taarsigassarsisitsinissamut siumut neriorsuutaanut, tak § 8, piumasaqaataasinnaavoq, § 7 malillugu taarsigassarsiatigut aningaasalersorneqaratik taarsigassarsiffiusinnaallutik aningaasartuutit tamarmiusut

anigaasalersorneqarnissaannut taarsigassarsisup kommunalbestyrelsimut anigaaserivimmi qularnaveeqqusiinissaa, tak. § 8.”

8. § 12 ima oqaasertalerneqassaaq:

” **§ 12.** § 7 malillugu taarsigassarsiatigut anigaasalersorneqaratik taarsigassarsiffiusinnaallutik aningaasartuutit tamarmiusut anigaasalersorneqarnissaannut taarsigassarsisup taarsigassarsiarisinnaasai, tak. § 8, illu sanaqataaffiusoq qularnaveeqqusiullugu qulakkeerneqarsinnaapput.

Imm. 2. Kommunalbestyrelsimit taarsigassarsiat illumi sanaqataaffiusumi qularnaveeqqusiisoqarneratigut isumannaarneqassapput.

Imm. 3. § 7 malillugu taarsigassarsiatigut anigaasalersorneqaratik taarsigassarsiffiusinnaallutik aningaasartuutininut tamarmiusunut taarsigassarsisup anigaasalersuinissaanut, illu sanaqataaffiusoq qularnaveeqqusiullugu taarsigassarsiissutigineqarsimasut, kommunalbestyrelsimit taarsigassarsiat ataqqissavaat, tak. § 8.

Imm. 4. Kommunalbestyrelsip taarsigassarsiarititai illumi sanaqataaffiusumi qaffatsinneqarlutik qularnaveeqqutaassapput.”

9. § 15, imm. 4 ima oqaasertalerneqassaaq:

” *Imm. 4.* Illumut sanaqataaffiusumut piginnittussaataaneq taarsigassarsitinneqartumut tunniunneqarsinnaanngippat, taarsigassarsisup nammineerluni akiliutigisai 25.000 koruuniusut, illumillu sanaqataaffiusumik sanaartornermi imaluunniit tigusinermi taarsigassarsiffiusinnaallutik aningaasartuutini tamarmiusuni taarsigassarsisup aningaasartuutigisimasai, § 7 malillugu taarsigassarsiatigut anigaasalersorneqanngitsut, kommunalbestyrelsip utertissavai, tak. § 8.”

10. § 23-mi, imm. 1-imi nr. 1-ip siorna normu 1-itut nutaatut ilanngunneqassaaq:

”1) Taarsigassarsiat erniaat akilersuutillu akilerneqanngippata, illuummilu qularnaveeqqusiussaqaarluni taarsigassarsinermi allagartaq malillugu ernianik akilersuutinillu akilersuisarneq pillugu malittarisassat naapertorlugit ernianut, akilersuutinullu akiitsut piffissarititaasup qaangiutinnginnerani taarsigassarsisup akilersimannngippagit, tak. lov for Grønland om pant (qularnaveeqqusiineq pillugu Kalaallit Nunaannut inatsit).”

Taassumap kingorna nr. 1-8, 2-9-nngussapput.

11. § 27-p kingorna qulequttap *Taarsigassarsinissamut qinnuteqarneq*-rup ataani ilanngunneqassaaq:

” **§ 27 a.** Illumik sanaqataaffiusumik nutaamik sanaartornissamut taarsigassarsitinneqarnissamut kommunalbestyrelsi tamanut ammasumik qinnuteqaqqusissaaq. Tamanut ammasumik qinnuteqaqqusineq marsip aallaqqaataanut piffissalerlugu, ukiumut ataasiartumik januaarimi pisassaaq. Ilassutitut anigaasaliinermi, qinnuteqarnissamut naammaginartumik piffissaliilluni tamanut ammasumik nutaamik

qinnuteqaqqusisoqassaaq.

Imm. 2. Qinnuteqaatit tiguneqartut suliarineqarnerini, tak. imm. 1, akuerisaallutik qinnuteqartut illutaarnissaminnut pisariaqartitsinerpaasut, inissaminnillu periarfissatut tunineqarnissaminnut periarfissaqanngitsut salliunneqassapput.

Imm. 3. Qinnuteqaatit tiguneqarsimasut suliarineqareerlutik aalajangiiffigineqarnerisa kingorna aningaasaliissutinik atunngitsuugaqassappat, tak. imm. 1, kingusinnerusukkut qinnuteqaatit tiguineri malillugit qinnuteqaatit suliarineqassapput.

Imm. 4. Qinnuteqartut illutaarnissaminnut pisariaqartitsinerisa, periarfissatullu inissiamik pilersornissaminnut periarfissaasa imm. 2 malillugu nalilersorneqarnissaanni kommunalbestyrelsip suut eqqarsaatigisassatut pingaartissinnaanera, pingaartissagailu pillugit Naalakkersuisut aalajangersaasinnaapput.”

12. § 32 ima oqaasertalerneqassaaq:

” **§ 32.** Missiliuummik, ingerlatsinermilu missingersuummik qinnuteqartumit akuerisassanngortitanik kommunalbestyrelsi saqqummiussissaaq. Matuma kingorna nammineq akiliutissat akilerneqarsimanerat, tak. § 10 b, imm. 2, aningaaserivimmit qularnaveeqqusiusaasannaasoq, tak. § 11, imm. 2 aamma akiliutaasannaasut akilerneqarsimanerat, tak. § 25, apeqqutaatillugit taarsigassarsisitsinissamut siumut neriorsuummik kommunalbestyrelsi qinnuteqartumut nalunaaruteqassaaq.”

13. Kapitali 4-mi § 32-p kingorna ilanngunneqassaaq

” **§ 32 a.** Ukiumut naatsorsuusiornermi kommunalbestyrelsip paasissutissat ukua ilanngutissavai:

- 1) Ukiumi naatsorsuusiorfiusumi taarsigassarsisitsinissamik siumut neriorsuutit amerlassusaat.
- 2) Taarsigassarsisitsinissamik siumut neriorsuutit atuuttut amerlassusaat.
- 3) Taarsigassarsisitsinissamik siumut neriorsuutit ukiumi naatsorsuusiorfiusumi naammassisimasut amerlassusaat.
- 4) Ukiumi naatsorsuusiorfiusumi aningaasaliissutinik tamarmiusunik atuineq.

Imm. 2. Paasissutissat sumiiffinnut agguataarneqassapput.

Imm. 3. Paasissutissat ataatsikkut Naalakkersuisunut nassiunneqassapput.”

14. § 33, imm. 2 ima oqaasertalerneqassaaq:

” *Imm. 2.* Sanaartorfigissaanermut, toqqavissap pilersaarusioneranut sanaartorneranullu, illumut suliarineqanngitsumut aamma innaallagissamut, imermut, kiassarnermullu ikkussuinermit kiisalu ilitersuisumit ikiorserneqarnermut taarsigassarsiissutit, suliat suliarineqarsimanerinit uppernarsaammik takutitsinikkut sulisartumut pineqartumut akilerneqassapput.”

§ 2

Inatsisartut inatsisaat manna ulloq 1. Juni 2024 atuutilissaaq.

Imm. 2. Inatsisartut inatsisaata matumap atuutilernissaa sioqqullugu illunut sanaqataaffiusunut taarsigassarsiarititat, taarsigassarsisitsinissamillu siumut neriorsuutit piunasaqaataat allanngortinnagit ingerlaqqiinnassapput.

Imm. 3. Inatsisartut inatsisaata atuutilernissaa sioqqullugu malittarisassat atuuttut naapertorlugit qinnuteqartut taarsigassarsitinneqarnissaminnik siumut neriorsorneqarsimasut, kommunalbestyrelsimut qinnuteqarnermikkut inatsisartut inatsisaanni matumani malittarisassat naapertorlugit taarsigassarsitinneqarnissaminnik nutaatut siumut neriorsorneqarsinnaapput.

Imm. 4. Taarsigassarsitinneqarnissamik siumut neriorsuummik nutaamik tunineqarnissamik qinnuteqaat kommunalbestyrelsip itigartissinnaavaa, tak. imm. 3, taarsigassarsitinneqarnissamik siumut neriorsuut tunngavigalugu inatsisitigut pituttorsimasumik aalajangersaasoqarsimappat imaluunniit nutaamik siumut neriorsuuteqarnissamut atatillugu aningaasartuuteqarnerunissamut aningaasaliissutitigut matussutissaqanngippat.

Kalaallit Nunaanni Namminersorlutik Oqartussat, ulloq xx. xxx 2023

Múte Bourup Egede
Naalakkersuisut Siulittaasuat